



De quel lieu & lignée estoit Tobie, sa captivité & deliurance, & comment il devint auuegle.

TOBIE fut de la lignée & Cité de Nephtali, lequel és iours de Salmanasar Roy des Assyriens, estant emmené captif, ne delaisa touresfois en telle captivité la voye de verité ains distribuait iournellement de ses biens à ses pauvres freres prisonniers, & ensepulturoit les morts. Il n'alloit aussi adorer les veaux esleuez par Ieroboam, mais seulement le Dieu d'Israël, luy offrant ses premiers fruits. Or print-il femme de sa lignée, nommée Anne, de laquelle il eut vn fils qu'il appella de son nom Tobie; & l'enseigna dès son enfance à craindre Dieu, & s'abstenir de peché. Ce bon personnage acquist grace enuers ledit Roy Salmanasar, & telle liberté, qu'il alloit où il vouloit. Outre plus, il consolait & reuestoit ceux de sa patrie. Salmanasar decédé, Sennacherib son successeur priua Tobie de ce qu'il possedoit. Peu apres aduenant que Sennacherib fut occis, il retourna en sa maison, où de ioye faisant vn festin à ses amis, & entendant qu'on auoit égorgé vn Israélite, laisse la compagnie, & le va querir pour l'enseuelir sur le soir. Ainsi mangeant son pain en pleurs & crainte: Il est vray, dit-il, ce qu'a dit le Prophete Amoz; Vos iours de festes seront changez en tristesse. Vne autresfois estant las d'enseuelir les morts & endourmy contre vn paroy, la fiente chaude d'une Arondelle tombant sur ses yeux, le rendit auuegle, dont neantmoins ne murmura point contre Dieu, au contraire reprit aigrement ses parens, qui luy reprochoient l'esperance qu'il auoit en Dieu, faisant aumosnes, & enseueillant les trepassez.